



DEO OPTIMO MAX.

UNI ET TRINO,

VIRGINI DEI - PARÆ, ET S. LUCÆ,
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS,
*manè discutienda, in Scholis Medicorum, die Martis trigesimā
mensis Martii, anno Domini M. DCC. XLV.*

M. EMMANUELE-MAURITIO DU VERNEY,
Doctore Medico, Præside.

An Panis iurulentus ad spissitudinem glutinosam percoctus, insalubris?

I.



UM peraguntur liberè corporis functiones, tunc sanum esse judicatur. Dulcissimum bonum sanitas. Ejus pretium carento melius quàm fruendo sentitur, jactura doloribus solet variis aggravari: infelicem prorsus eum dicas qui amisit, nisi Religione fultus animi vigorem è corporis debilitate eruat. Prudentiæ est sanitatem, quantum licet, tueri. At fortasse tenuior videbitur nostra quaestio, nec satis digna quæ Medici attentionem postulet. Parva, inquit, negligere satius; nec eum decet ad minuta descendere, cujus ars tam latè patens circa grandia potiùs, & magis necessaria debet occupari. Hæc non facile objiciat qui Medicinæ naturam perspexerit: nec parvum dicat quidquid lædere sanitatem potest. Non vilescit Medicus si de minimis rectè & appositè dixerit, Crea-

tor ipse cum siderum motus, æstus marium, universi orbis corpora regat & moderetur: tamen sine Summæ Majestatis offensione, etiam capillos capitis nostri numerat. Dei minister, tantum exemplar, quâ licet, æmulans, nullam observationem respuat quæ cum utilitate conjuncta sit; nec alta solùm & nobilia investiget, ea quoque disquirat quæ vulgaria videntur. Idem scopus in utrisque, quid humano corpori bonum, quid contrarium, expendere. Quæstionem seligimus non operosam, intricatamve, sed expeditam & facilitate allicientem suâ. Et si talia non magni referre videantur, saltem probant quædam posse in singulis notari; porro scientia Medici in observatione posita est. A parvis quandôque ad majora conscenditur. Ex pluribus comparatis exurgere potest utilis cognitio. Si quis vel inania modò ingeniosè tractet, laudi tribui solet; cur vitio verteretur, quoddam res ad incolumitatem pertinentes scrutemur accuratius? Fateamur præfens argumentum & similia, licet generalis usus, causariis præcipuè, aut è morbo resciri incipientibus, sanis verò minùs attendenda. Ut autem mala etiam gravia spernere viri fortis est: ita Medici sapientis etiam levia cognoscere, observare, præcavere, aliis, ut caveant, indicare. Præterea quæ levia per se & etiam ferè nulla sunt, si sapius removenur, si quotidie recidant, ingravescent & periculosa evadunt. Quid autem frequentius usu cibi de quo agitur, Medici officium est cautiones pro rei gravitate adhibere, si periculum urgeat, si insignis noxa timenda sit, sedulò & sine morâ, præoccupet. Si levis est metus, si non nisi successu temporis immincat labis discrimen, prudenter advertat, & paulatim morbis obices ponat.

I I.

QUÆRES à quo pendeat functionum facilitas in quâ modo sanitatem statui-
mus, Nimirum ab æquabili & ordinato liquorum circuitu, hic autem nisi pos-
sit à sanguinis crasi conveniente stare non potest. Quidquid sanguinis indolem genui-
nam fovet & ipsius liquorumque ex eo manantium liberum tuetur per vasa itum-
reditumque, sanitati favere meritò credas. Contra, quod sanguini noxam inferre,
quod chyli confectionem retardare, & liberam distributionem impedire aptum est,
plus minùs sanitati nocet. His attendere prout rei natura postulat, Medici partes
sunt. Placuit veteribus quæcumque corpori humano nocere vel prodesse idonea sunt,
non-naturalia nuncupare. Inter cætera plurimùm posse alimentorum delectum ne-
mo negaverit. Inde conficitur chylus sanguini reparando allaborans: dum enim
circuit sanguis, & omnium universi corporis humorum materiam suppeditat, dum
vasis ipsius & canalibus qui motu assiduo deteruntur resarciendis inservit, quodidia-
no nutrimento opus est, quod digestionis ope in substantiam corporis facessat. No-
vo in dies chylo appellente, novus quoque sanguis procreatur. Hujus gelatinosa
pars, lympa nutritia, per extremitates arteriarum sive porosas, sive in vascula lym-
phatica abeuntes, lateribus vasorum applicatur, & in vacuola interstitiaque inseri-
tur, sic renovantur perpetuò solidorum stamina. E sanguine etiam fecerni multi-
plici indolis liquida omnibus compertum est. Nempè per tubulorum ad incredibi-
lem usque exilitatem glomeratorum replicatorumque gyros & anfractus diversè pre-
mitur, citius tardiusve impellitur & particulas diversæ molis, figuræ variæ, pro in-
cerniculorum quæ offendit, varietate, hic, illic deponit. Cibi necessitatem famis
sensus indicat. Hic in sanis vividus est, & necessitati corporis accommodatur, in
ægris inordinatus, quandôque ultra modum augetur, sapius verò retunditur. Ejus
loco deliquia, vium defectum prostrationemve non facillè reparabilem plerum-

que significant. Tunc vitiatis, ut contingere solet, humoribus, ac speciatim liquore gastrico, alimentorum digestionem via præcluditur, quæ maximi momenti est.

I I I.

CIBUS nullus Pane usitior, nullus salubrior. Hunc appetere signum sanitatis est; fastidiare morbi indicium. Cerealia, frumentum præsertim (ex eo conflatus Panis optimus) non ut animantium carnes redundant sulphuribus. Non leguminum ad instar crassiori substantiâ constant. Non olerum more aqueis turgent particulis: Friabilia sunt, levia, solvi, ac dividi habilia, facili in pollinem reducuntur. Hinc citius cremorem educas. Panis sit mollis, nec humidus, nec siccus, ex farinâ purâ, novâ & benè subactâ: hic in chylum converti aptissimus. Ad conficiendum Panem multas subit farina præparationes. Harum ope ad convenientem in ventriculo coctionem recipiendam disponitur. Primò molâ pistrinove tundi, teri, dividi farina debet; debet Panis ventriculi motu, non immenso illo & incredibili quem ipsi affingere placuit, sed mediocri & placido, versari, agitari, attenuari. Aquâ postmodum affusâ farina diluitur; Panem succo salivâ & gastrico imbui necesse est. Hunc succum si putes fermenti lenis, nec à statu sano abhorrentis vicem gerere (absit verbo invidia) nonne pastam priùs oportuit verò fermentari quàm clibano committatur. Denum moderato clibani calore coquitur, perficitur; ventriculi calorem digestionem non inutilem admodum verisimile. Ex dictis colligitur Panem inter eupepta alimenta recensendum.

I V.

APUD varias gentes præcipuè autem apud nos, in usu positum est Panem vel ex aquâ, sive cum carnibus, sive cum oleribus, adjuncto butyro, &c. vel ex lacte coquere. Scilicet ut calore resolutus digestionem aptior evadat. Illud eduli genus non ad delicias tantum modò comparatum; ad sanitatem etiam conferre, maximè in debilibus, fatemur. Nec ignis operam recusare in animo est: sed time ne ex amico hostis fiat. Ejus officio utere; necessarium est. Cave autem ne vehementius agat. Cave ne protrahatur longius periculosi officii usura. Quod moderatum profuisset, quod blandè initio affecit, cane pejus & angue, intensiori aut diuturniori nocebit actione. Curandum ut Panis integrantes partes convellantur paululùm, leviter ab invicem dimoveantur; ita ut laxiùs junctæ remaneant: id obtrinebis si Panis superficiem, trans patinæ poros, calor igneus paulatim & per gradus penetraret, & intra ipsius compagem se se, ut par est, insinuet. Itaque coquentis manus offerum latera alternatim igni opportunè objiciat. Nunc subjacentia supramanet; mox superiora versùs patinæ infima declinet. Panis substantiam plus a quo dissolvi non sinat; ne in pulcram spissiore aut potius in gluten viscumque degeneret. Ignem puta armamentarium quoddam mille jaculis telisæ factum. Si nimia coctione liberior detur aditus, quâ datâ portâ ruent & incendia parabunt. Mitto strages à salibus carniū evolutis, à butyri everso sulphure procreandas. Panis solius habeatur ratio. Si partes aquosæ avolent, si assatim irruerint igneæ, pastæ speciem præ densitate tantum non exhibebit. Hæc in sanguinem pro mollibus tenuibusque particulis succos deferet, indigestos; pro balsamicis & gelatinosis acria quædam & velut pungentia spicula concitandis sulphuribus & salibus idonea. Ventriculi motus non bene versat moleculas frangi renitentes ac firmiùs coherentes. Difficilè coquet

4

partes rigidas, liquore orbatas, Fibræ ab adustis, ab igneis, si quæ superfint, partibus irritabuntur. Cum enim pro summâ tenuitate & pernicitate Panis intima pervadant; non facile egredi, verum aliquas forsan in angulis meatibusque residuas delitescere non immeritò suspicaberis. At etiamsi vix ulla omninò post certum temporis spatium remanere contendas, certè inharere ardoris reliquias fatearis necesse est. Quem inde chylum expectes? Nempè lentescentem, ad phlogosim propensum, & intestinis infarctus, molestias, tumultus illaturum. Mirari desine, si consequantur nausæ, cardialgiæ, ructus, borborygmi, ventris tormina, flatus, paroxysmi febriles, multiplex animalis œconomix depravatio. Nec fallaci coquorum arti credideris. Hæc sæpe irritamenta gulæ proponens, celat sub aridentibus palato ferculis latentes insidias. Nam sæpe ubi consumpro jure Panem torrefecerunt, novum jus affundendo gluten diluere solent. Sic incipientem coctionem mentiuntur, nimia vitia noxasque dissimulantes. Sic exsiccata recoquendo somites fomitibus adjiciunt. Quin etiam rufa juscula & aureum colorem referentia mensis offerre amant; nec solùm ex carnibus talia eliciunt quæ fornaces liquidas meritò nuncuparis, ea quoque è crustis adustis sive penitus exsiccatis exprimunt. Harum loculi, nota ignis receptacula, subtilissimis scintillis recipiendis, asservandisque apprimè pares.

V.

FRUSTRÀ objicies Panem bis coctum & induratum à navigantibus quibuscumque usurpari. Hunc morem ex necessitate & cibi melioris inopiâ inventum in exemplum trahi non posse manifestum est. A pari carnes fumo induratas & sale conditas ut diutius servantur nemo salubriores affirmârit. Quod ad usum spectat, qui circa plurimos ægrotantes obtinet; Panem sensim sine sensu, jure identidem affuso, imbuere, dividere, coquere licet; modò ignis lentior miorque sit, absque ut vituperemus coctionem moderatam in quâ temporis diuturnitas caloris mediocritate compensatur. Repones hanc vigere apud innumeros consuetudinem, eos maxime quibus novam quotidie pultriculam coquere per facultates non licet, ut hesternam aut à pluribus etiam diebus asservatam iterùm atque iterùm foco superponant. Quid inde eruas? Si prima coctio sufficiens, si perfecta fuerit, ferculum sequentibus vicibus ultra modum coquetur, sic minùs salubre pro certò evadet. Adde non solum Panem, sed quæ cum eo concocta sunt fermentari, degenerare, accessere, vitari.

Ergò Panis jurulentus ad spissitudinem glutinosam percoctus, insalubris.

Proponebat Parisiis, NATALIS-ANDREAS-JOANNES-BAPTISTA CHESNEAU, Cenomanus, Doctor Medicus Remensis, Saluberrimæ Facultatis Parisiensis Baccalaureus Medicus, A. R. S. H. 1745,
à sextâ ad merideim.